



AN COIMISIÚN
EORPACH

An Bhruiséil, 26.3.2020
COM(2020) 116 final

2020/0045 (NLE)

Togra le haghaidh

CINNEADH ÓN gCOMHAIRLE

**maidir leis an seasamh atá le glacadh thar ceann an Aontais Eorpaigh sa Choiste CCE
arna bhunú faoin gComhaontú Comhpháirtíochta Eacnamaíche eatramhach idir Gána,
de pháirt, agus an Comhphobal Eorpach agus a Bhallstáit, den pháirt eile, a mhéid a
bhaineann le glacadh Rialacha Nós Imeachta an Choiste CCE**

MEABHRÁN MÍNIÚCHÁIN

1. ÁBHAR AN TOGRA

Baineann an togra seo leis an gcinneadh lena leagtar síos an seasamh atá le glacadh thar ceann an Aontais sa Choiste arna bhunú faoin gComhaontú Comhpháirtíochta Eacnamaíche ('CCE' feasta) eatramhach idir Gána, de pháirt, agus an Comhphobal Eorpach agus a Bhallstáit, den pháirt eile ('an Coiste CCE'), i ndáil leis na Rialacha Nós Imeachta a bheartaítear a ghlacadh le haghaidh an Choiste CCE.

2. COMHTHÉACS AN TOGRA

2.1. An Comhaontú Comhpháirtíochta Eacnamaíche eatramhach idir Gána, de pháirt, agus an Comhphobal Eorpach agus a Bhallstáit, den pháirt eile

Tá sé d'aidhm ag an gComhaontú Comhpháirtíochta Eacnamaíche eatramhach idir Gána, de pháirt, agus an Comhphobal Eorpach agus a Bhallstáit, den pháirt eile ('an Comhaontú') an méid seo a leanas a dhéanamh:

- (a) Deis a thabhairt do Ghána leas a bhaint as an rochtain mhéadaithe ar an margadh arna deonú ag an Aontas faoi chuimsiú creata caibidlíochta CCE agus ar an gcaoi sin suaitheadh trádála idir Gána agus an tAontas a sheachaint nuair a thiocfaidh deireadh le córas trádála idirthréimhseach Chomhaontú Cotonou an 31 Nollaig 2007, go dtí go dtabharfar CCE iomlán i gcrích;
- (b) Na forais a leagan síos chun CCE a chaibidliú a rannchuideoidh le laghdú na bochtaineachta, a chuirfidh an comhtháthú réigiúnach, an comhar eacnamaíoch agus an dea-rialachas chun cinn san Afraic Thiar agus a mhéadóidh cumas na hAfraice Thiar i réimsí an bheartais trádála agus na saincheisteanna a bhaineann le trádáil;
- (c) Comhtháthú comhchuí Ghána sa gheilleagar domhanda de réir a chéile a chur chun cinn i gcomhréir lena roghanna polaitiúla agus tosaíochtaí forbartha;
- (d) Na naisc atá ann cheana idir na Páirtithe a neartú ar bhonn na dlúthpháirtíochta agus an leasa fhrithpháirtigh;
- (e) Comhaontú a chruthú a luífidh le hAirteagal XXIV de CGTT 1994.

Cuirfear an Comhaontú idir Gána, de pháirt, agus an tAontas Eorpach agus a Bhallstáit, den pháirt eile, i bhfeidhm go sealadach ón 15 Nollaig 2016.

2.2. An Coiste CCE

Le hAirteagal 73 den Chomhaontú bunaítear an Coiste CCE agus foráiltear go bhfuil sé freagrach as na réimsí ar fad a chumhdaítear leis an gComhaontú a riar agus as na cúraimí ar fad a luaitear sa Chomhaontú a dhéanamh.

In Airteagal 73 den Chomhaontú foráiltear go n-aontóidh na Páirtithe go gcloífidh comhdhéanamh, eagrú agus nós imeachta an Choiste CCE le prionsabal an chomhionannais. Cinnfidh an Coiste na rialacha maidir lena eagrú agus feidhmiú féin. Féadfar cruinnithe an Choiste CCE a oscailt do thríú páirtithe chomh maith. Féadfar cuireadh a thabhairt do Choimisiún Chomhphobal Eacnamaíoch Stáit na hAfraice Thiar (ECOWAS) freastal ar chruinnithe an Choiste CCE, de réir a nósanna imeachta inmheánacha.

In Airteagal 2 de na Rialacha Nós Imeachta atá le glacadh, léirítear go mbeidh an Coiste CCE comhdhéanta d'ionadaithe ón Aontas Eorpach agus ionadaithe ó Ghána, ar leibhéal na n-airí agus na n-oifigeach sinsearach.

In Airteagal 9 de na Rialacha Nós Imeachta atá le glacadh, foráiltear go nglacfaidh an Coiste CCE a chinntí agus a mholtaí de chomhthoil.

2.3. An gníomh atá beartaithe ag an gCoiste CCE

Le linn an chéad leath de 2020, tá cinneadh maidir lena Rialacha Nós Imeachta le glacadh ag an gCoiste CCE ('an gníomh atá beartaithe').

Is é is aidhm don ghníomh atá beartaithe rialacha maidir le heagrú agus feidhmiú an Choiste CCE a leagan síos.

3. AN SEASAMH ATÁ LE GLACADH THAR CEANN AN AONTAIS

Leis an togra seo le haghaidh Cinneadh ón gComhairle, leagtar síos an seasamh atá le glacadh thar ceann an Aontais sa Choiste CCE arna bhunú leis an gComhaontú, maidir le Rialacha Nós Imeachta an Choiste CCE.

Phléigh na Páirtithe sa Chomhaontú na Rialacha Nós Imeachta atá beartaithe agus chomhaontaigh siad gur cheart don Choiste CCE na Rialacha Nós Imeachta sin a ghlacadh le linn an chéad leath de 2020, faoi réir nósanna imeachta cinnteoireachta an Aontais.

Tá substaint na Rialacha Nós Imeachta atá beartaithe cosúil leis na Rialacha Nós Imeachta a bhaineann le comhaontuithe trádála eile de chuid an Aontais.

Tá na Rialacha Nós Imeachta bunriachtanach chun creat institiúideach an Chomhaontaithe a chríochnú agus, dá bhrí sin, chun cur chun feidhme rianúil an Chomhaontaithe a áirithiú.

4. BUNÚS DLÍ

4.1. Bunús dlí an nós imeachta

4.1.1. Prionsabail

Déantar foráil, le hAirteagal 218(9) den Chonradh ar Fheidhmiú an Aontais Eorpaigh (CFAE), maidir le cinntí lena leagfar síos “na seasaimh a ghlacfar thar ceann an Aontais i gcomhlacht arna chur ar bun le comhaontú nuair a iarrtar ar an gcomhlacht sin gníomhartha a ghlacadh a bhfuil éifeachtaí dlíthiúla leo, seachas gníomhartha lena bhforlíonfar nó lena leasófar creat institiúideach an chomhaontaithe.”

Áirítear ar na ‘gníomhartha a bhfuil éifeachtaí dlíthiúla leo’ gníomhartha a bhfuil éifeachtaí dlíthiúla leo de bhua rialacha an dlí idirnáisiúnta lena rialaítear an comhlacht i gceist. Áirítear leis freisin ionstraimí nach bhfuil éifeacht cheangailteach leo faoin dlí idirnáisiúnta, ach ‘a d’fhéadfadh tionchar cinntitheach a imirt ar ábhar na reachtaíochta a ghlacfaidh reachtóir an Aontais Eorpaigh’¹.

4.1.2. Feidhm maidir leis an gcás seo

Is comhlacht é an Coiste CCE a bunaíodh le comhaontú, is é sin an CCE eatramhach idir an tAontas Eorpach agus Gána.

Is é atá sa ghníomh a iarrtar ar an gCoiste CCE a ghlacadh gníomh a bhfuil éifeachtaí dlíthiúla leis ós rud é go leagfar síos rialacha dlíthiúla reachtacha maidir le feidhmiú an Choiste CCE leis an ngníomh sin.

Leis an ngníomh atá beartaithe, ní fhorlíontar creat institiúideach an Chomhaontaithe ná ní leasaítear é.

¹ Breithiúnas na Cúirte Breithiúnais an 7 Deireadh Fómhair 2014, an Ghearmáin v an Chomhairle, C-399/12, ECLI:EU:C:2014:2258, míreanna 61 go 64.

Dá bhrí sin, is é Airteagal 218(9) CFAE bunús dlí an nós imeachta le haghaidh an chinnidh atá beartaithe.

4.2. Bunús dlí substainteach

4.2.1. Prionsabail

An bunús dlí substainteach atá le cinneadh faoi Airteagal 218(9) CFAE, braitheann sé go príomha ar chuspóir agus ábhar an ghnímh atá beartaithe a bhfuiltear ag glacadh seasamh thar ceann an Aontais ina leith. Má tá dhá aidhm leis an ngníomh atá beartaithe nó má tá dhá chomhpháirt ann agus más féidir ceann de na haidhmeanna nó de na comhpháirteanna sin a shainaithint mar phríomhaidhm nó mar phríomh-chomhpháirt agus an ceann eile mar aidhm nó mar chomhpháirt theagmhasach, ní mór an cinneadh faoi Airteagal 218(9) CFAE a bhunú ar bhunús dlí substainteach aonair, is é sin an bunús dlí a éilítear de réir na príomhaidhme nó na príomhchomhpháirte.

4.2.2. Feidhm maidir leis an gcás seo

Is leis an gComhbheartas Tráchtála a bhaineann príomhchuspóir an Chomhaontaithe agus ábhar an ghnímh atá beartaithe.

Dá bhrí sin, is é an chéad fhomhír d'Airteagal 207(4) CFAE an bunús dlí substainteach le haghaidh an chinnidh atá beartaithe.

4.3. Conclúid

Ba cheart an chéad fhomhír d'Airteagal 207(4) CFAE, i gcomhar le hAirteagal 218(9) CFAE, a bheith mar bhunús dlí le haghaidh an chinnidh atá beartaithe.

5. FOILSIÚ AN GHNÍMH ATÁ BEARTAITHE

Ós rud é go leagfaidh gníomh an Choiste CCE síos rialacha nós imeachta don Choiste CCE faoin gComhaontú, is iomchuí é a fhoilsiú in *Iris Oifigiúil an Aontais Eorpaigh* tar éis a ghlactha.

Togra le haghaidh

CINNEADH ÓN gCOMHAIRLE

maidir leis an seasamh atá le glacadh thar ceann an Aontais Eorpaigh sa Choiste CCE arna bhunú faoin gComhaontú Comhpháirtíochta Eacnamaíche eatramhach idir Gána, de pháirt, agus an Comhphobal Eorpach agus a Bhallstáit, den pháirt eile, a mhéid a bhaineann le glacadh Rialacha Nós Imeachta an Choiste CCE

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe an chéad fhomhír d’Airteagal 207(4) de, i gcomhar le hAirteagal 218(9) de,

Ag féachaint don togra ón gCoimisiún Eorpach,

De bharr an mhéid seo a leanas:

- (1) Shínigh an tAontas Eorpach agus a Bhallstáit an Comhaontú Comhpháirtíochta Eacnamaíche (‘CCE’) eatramhach idir Gána, de pháirt, agus an Comhphobal Eorpach agus a Bhallstáit, den pháirt eile, an 28 Iúil 2016² (‘an Comhaontú’). Tá sé á chur i bhfeidhm go sealadach idir an tAontas Eorpach agus a Bhallstáit, de pháirt, agus Gána, den pháirt eile, ón 15 Nollaig 2016³.
- (2) De bhun Airteagal 73(3) den Chomhaontú, tá an Coiste CCE freagrach as na réimsí ar fad a chumhdaítear leis an gComhaontú a riar agus as na cúraimí ar fad a luaitear sa Chomhaontú a dhéanamh. De bhun Airteagal 73(2), is é an Coiste CCE a chinneann na rialacha maidir lena eagrú agus feidhmiú féin.
- (3) Tá cinneadh maidir lena Rialacha Nós Imeachta le glacadh ag an gCoiste CCE sa chéad leath de 2020.
- (4) Is iomchuí an seasamh atá le glacadh thar ceann an Aontais sa Choiste CCE a leagan síos, ós rud é go mbunófar rialacha atá ceangailteach ó thaobh an dlí de leis an gcinneadh atá beartaithe ag an gCoiste CCE,

TAR ÉIS AN CINNEADH SEO A GHLACADH:

Airteagal 1

Beidh an seasamh atá le glacadh thar ceann an Aontais bunaithe ar an gcinneadh ón gCoiste CCE lena mbunaítear Rialacha Nós Imeachta an Choiste CCE, rud atá ag gabháil leis an gCinneadh seo.

² An Comhaontú Comhpháirtíochta Eacnamaíche eatramhach idir Gána, de pháirt, agus an Comhphobal Eorpach agus a Bhallstáit, den pháirt eile, (IO L 287, 21.10.2016, lch. 1).

³ Cinneadh (AE) 2016/1850 ón gComhairle an 21 Samhain 2016 maidir leis an gComhaontú Comhpháirtíochta Eacnamaíche eatramhach idir Gána, de pháirt, agus an tAontas Eorpach agus a Bhallstáit den pháirt eile, a shíniú agus a chur i bhfeidhm go sealadach

Airteagal 2

Dírítear an Cinneadh seo chuig an gCoimisiún.

Arna dhéanamh sa Bhruiséil,

*Thar ceann na Comhairle
An tUachtarán*